

女科準繩四之四

胎前門

眼目 臟 膝 悲 傷

妊病可下胎 斷胎

胎自墜 胎不長

日月未足 欲產過期不產

鬼胎 臨產坐草法 催生法

下死胎法

眼目

一婦將臨月忽然兩目失明不見燈火頭痛眩暈項
腮腫滿不能轉頸諸治不瘥反加危困偶得消風散
服之病減七八獲安分娩其眼弔起人物不辨乃以
四物湯加荆芥防風更服眼科天門冬飲子二方間
服目漸稍明大忌酒麵煎炙鷄羊鵝鴨豆腐辛辣熱
物并房勞此證因懷妊多居火間衣著太煖伏熱在
內或酒麵炙煨太過以致胎熱也

天門冬飲子 治妊娠肝經風熱上攻眼目帶弔失
明

天門冬

去心

知母

菴蔚子

五味子

防風

去蘆

茯苓

去皮

川羌活

去蘆

人參

各壹錢

右作一服水貳鍾生薑叁片煎至壹鍾食後服

臟躁悲傷

陳良甫記管先生治一妊娠四五箇月臟躁悲傷遇晝則慘慄淚下數欠象若神靈如有所憑醫與巫皆無益與仲景大棗湯一投而愈薛前證或因寒水攻心或肺有風邪者治當審察一妊婦無故自悲用大棗湯二劑而愈後復患又用前湯佐以四君子加山梔而安一妊婦悲哀煩躁其夫詢之云我無故但自欲悲耳用淡竹茹湯爲主佐以八珍湯而安仲景婦人臟躁悲傷欲哭象如神靈所作數欠伸甘麥大棗湯主之

甘麥大棗湯方

甘艸

參兩

小麥

壹升

大棗

拾枚

右以水陸升煮取參升溫分三服亦補脾氣

許學士云鄉里有一婦人數次無故悲泣不止或謂之有祟祈禳請禱備至終不應予忽憶金匱有一證云婦人臟躁悲傷欲哭象如神靈數欠伸者宜甘麥大棗湯予急令治藥盡劑而愈古人識病制方種種絕妙如此

淡竹茹湯

治妊婦心虛驚悸臟躁悲傷不止又治

虛煩甚効

麥門冬

去心

小麥

半夏

湯泡各貳兩半

人參

白茯苓

各壹兩半

甘草

壹兩

右剉散每服肆錢薑五片棗壹枚淡竹茹壹團如

指大同煎溫服

又方 治胎臟躁自悲自哭自笑

右以紅棗燒存性米飲調下

女科

卷四

三才

妊病可下胎斷胎

大全妊娠羸瘦或挾疾病臟腑虛損氣血枯竭既不
能養胎致胎動而不堅固終不能安者則可下之免
害妊婦也薛前證宜用腰腹背痛門方論主之其
胎果不能安者方可議下慎之慎之鴻臚張淑人
痢疾後胎動心神不安肢體殊倦用八珍散二十餘
劑漸愈因勞加煩熱頭痛以大劑補中益氣湯加蔓
荊子治之熱痛頓止仍用前散又五十餘劑而安其
後生產甚易今大中丞許少薇公向令金壇時夫
人胎漏療治不止時迫於上計公欲因其勢遂下之

謀於余余第令服佛手散以爲可安卽安不可安卽下順其自然而已旣數服公憂疑不決女科醫者檢方以進乃用牛膝壹兩酒煎服謂牛膝固補下部藥耳用之何害公遂信而服之而胎果下余時有從母之戚未及知比知而馳至則聞盈庭皆桂麝氣蓋因胞衣未下許醫又進香桂散矣血遂暴下如大河決不可復止亟煎獨參湯未成而卒公哀傷甫定而過余謝且諭余曰牛膝補藥而能墮胎何也余對曰生則宣而熟則補故破血之與填精如箭鋒相拄豈獨牛膝哉鹿角亦墮胎破血而煎爲白膠則安胎止血

因其熟而信其生此之謂粗工公歎恨無已余故特著之以爲世戒

大全治妊娠母因疾病胎不能安可下之取七月七

日法麴

大全作麴

肆兩水貳大盞煎取壹盞參分綿濾去

滓分溫三服立下

又方大麴伍升清酒壹斗煮二

沸去渣分五服隔宿勿食但再服其子如糜母無疾

苦

千金不傳妙

又方麥蘖壹升爲末和水煮貳升服之

卽下

神効

又方附子

貳枚

爲末以淳苦酒和塗右足去

之大良

又方取雞子壹枚以三指撮鹽放鷄子中

服之立出

按陳良甫所列有牛膝湯桂心散諸方婁全善皆不之取而獨取此數方其見卓矣

斷產丹斷子法 用白麵麴壹升無灰酒伍升打作糊煮貳升半用絹帛濾去渣作叁服候前月經將來日晚下吃一服次日五更吃一服天明吃一服月經卽行終身絕子

大斷產驗方故蠶紙方圓壹尺燒爲末酒飲調服終身不復懷孕 又方用油煎水銀一日方息空心服棗核大壹丸永斷孕不損人

四物湯每服伍錢加芩薹子貳錢於經行後空心溫

服

薛前云用蠶故紙尺許燒灰爲末產後酒服之血虛者終不復孕大抵斷產之劑多用峻厲往往有不起者是則產之害未若斷產之害也吾聞閣老張羅峰太常李恒齋俱因服斷產之劑自謂形體俱怯遇勞必病有由然矣

按夷堅志載東京女子白牡丹以售墮胎藥生得惡報今雖列如上方以備萬一之用用者尙其慎之

九

卷四

皇

石經堂

胎自墮

丹陽施陰化胎孕乃成血氣虛損不足營養其胎自墮或勞怒傷情內火便動亦能墮胎推原其本皆因於熱火能消物造化自然病源乃謂風冷傷於子臟而墮此未得病情者也予見賈氏婦但有孕至三月左右必墮診其脉左手大而無力重取則濇知其血少也以其妙年只補中氣使血自榮時正夏初教以濃煎白朮湯下黃芩末壹錢服三四十貼遂得保全其生因而思之墮因內熱而虛者於理爲多曰熱曰虛當分輕重蓋孕至三月正屬相火所以易墮不然

何以黃芩熟艾阿膠等爲安胎妙藥耶好生之工幸
無輕視 一婦年三十餘或經住或成形未具其胎
必墮察其性急多怒色黑氣實此相火太盛不能生
氣化胎反食氣傷精故也因令住經第二月用黃芩
白朮當歸甘艸服至三月盡止藥後生一子 一婦
經住三月後尺脉或濇或微弱其婦却無病知是子
宮真氣不全故陽不施陰不化精血雖凝終不成形
至產血塊或產血胞 一婦腹漸大如懷子至十月
求易產藥察其神色甚困難與之藥不數日生白蟲
半桶蓋由婦之元氣太虛精血雖凝不能成胎而爲

穢腐蘊積之久濕化爲熱濕熱生蟲理之所有亦須
周十月之氣發動而產終非佳兆其婦不及月死濕
熱生蟲譬之溝渠污濁積久不流則諸蟲生于其間
矣汪石山治一婦長瘦色黃白性躁急年三十餘
常患墮胎已七八見矣診其脉皆柔軟無力兩尺雖
浮而弱不任尋按曰此因胎墮太多氣血耗甚胎無
滋養故頻墮譬之水涸而禾枯土削而木倒也况三
月五月正屬少陽火動之時加以性躁而急發之故
墮多在三五七月也宜大補陰湯去桂加黃蘗黃芩
煎服仍用研末蜜丸服之庶可保生服半年胎固而

生二子

錢仲陽治一孕婦病醫言胎且墮錢曰妊

者五臟傳養率六旬乃更候其月偏補之何必墮已

而母子皆全

陳斗崑治一婦有胎四月墮下逾旬

腹腫發熱氣喘脉洪盛面赤口鼻舌青黑陳診之曰

脉洪盛者胎未墮也面赤心火盛而血乾也舌青口

鼻黑肝旣絕而胎死矣內外皆曰胎墮久矣復診色

脉如前以蛇蛻煎湯下平胃散加芒硝歸尾一倍服

之須臾腹鳴如雷腰腹陣痛復一死胎隨下病亦愈

程仁甫治一婦年近四十稟氣素弱自去其胎五

日內漸漸腹脹如鼓至心前上吐不能食用補藥不